


FASNACHTSGESELLSCHAFT



BASEL ALTI GARDE GEGR. 1995

Fasnacht 2003

HORROR MEDICINALIS

Het Dy Doggter en Exame?

Die maischte von ys alte Muggen
dien do und dert halt Bräschte drugge.
S inner Fyrr isch zwor no do,
d Jooring aber spyrt me scho.
Und wenn s denn zwiggt und zwaggt im Ranze
de au mit Schnaps kasch nimme danze,
so gsesch e mänge wo verglemmt
denn doch zem näggschte Doggter rennt.
Är luegt ans Praxisschildli aane
und froggt sich : Hett dä denn s Exame ?
In Basel het, s isch unverschämt,
ain joorelang an d Fiidle glängt.
Är kiemi schynnts us Klagefuurt
und syg dert wäg de Glaage fuurt.
Im wysse Kittel mit em Schildli,
statt em Diplom e Hochglanzbildli,
versegget Alti är und Goofe:
D Beheerde die dien ganz dief schloofe!
Die Sau het nie s Exame gmacht !
Bim San. Dep. do isch diefi Nacht!
Dr Fritz duet schreggig staggele,
nid oobe – unde duet s nur gwaggele
wenn är als sot ganz fescht go brinze,
duet s Schnäpperli nur no laam blinze!
Und druurig immen Egge hoggt er
är waiss: Ych muess zem Pfyfflidoggtter!
Sälle duet dr Fritz vermässe -
und goot denn zerscht go Znyynyässe.
Denn maint dä Dettel ganz galant,
het schon e Zangen in der Hand,
„Die Proschtata muess wäg und ex
neu inschtalliert wird Sanipex,
und ass denn s Säftli au ka fliesse,
duen y Rohr – Fit noochegiesse.
Drepflats no in d Hosen yyne
wiggly Hanf mit Vaseline!“
Dr Fritz schreyt panisch: Aber au,
dasch doch kai Arzt, das isch e Sau!
S Miggy, s fyyne Dryybeli
het pletzig vyyli Byybeli.
S gschtudierte Frailain kennt do nyt,
dr Hutarzt isch jo gar nit wyt.

Dr Doggter R (Punggt) Plättli schreyt:
„Dä Untergrund isch halt nit gscheyt!
Jetz diemer alles abeschutze,
und d Heersaalschäden uusebutze.
D Keramik glänzt denn wie veruggt,
d Fuege gschpachtlet und verdruggt.
Y magge Kaffi mit em Loffoli
und schlurppe wäg mit de Pantoffoli!“
S Miggy hets vor Schregg verjätet
und s letschte Vaterunser bätet.
Dr Hampe het e grosse Zingge,
d Reety kunnt vom Ruugeli – Dringge,
unter den Auge groossi Seggli
seen uss wie halbi droggni Weggli.
Dr Gsichtschirurg gseets nit so duschter:
“Ych mach jetz grad e guet Schnittmuschter,
denn schnyyd y zue und das nid z knapp
bim Schlänggle stegg y d Linien ab,
und Hoolsaim gits uf baide Sytte,
zwei Bäggli mit Stopfwatte wytte,
d Kopfhutt blybt am beschte doo
fir d Aabroob derfe sy denn koo!“
Der Hampe hyyt: „ Jä nundefaane,
het dä bim Dior gmacht s Exame?“
Bim Hanny spiile halt d Hormeenli
im Unterlyyb nimm scheeny Deenli.
Dr Huusgaischt luegt in däre Noot,
ass äs zem Zwätschgelidoggtter goot.
D Frau Doggter Vogel – Kundere,
sy luegt denn zerscht no undere,
mit em Fäärnroor in der Hand
do gafft sy zwai Stund umenand
und schreyt uffsmool: Nai! Y verregg,
jetz gseen y sy, die Aierstegg!
Ersetzte mir dä Uterus
dur der Wiehnachts – Puterus!“
S Hanny isch in Oonmacht gheynt,
Im Draum heert s denn wie aine schreyt:
„Die Sau het sicher kai Exame,
heb dääre jo nid lenger aane!“
Es gäabt jetz ainigs denn no z brichte
vo so gruusig - glatte Gschichte.
Vom Schizo wo zem Psychi lauft:
Dr Pfarrer het denn baidi dauff!
Vo dämm wo s Schiinbai ganz wiescht iiblet:
Dr Schryner, dä het do lätz diiblet!
Vom Ueli wo fir d Wurze z fyyle
vier Stund bim Metzger duet verwyyle!

Die Säu hänn nie s Exame gmacht ! E Kontrolle ? Nai das wär jo glacht !

Vom Fasnachtsmächtig Zoobe bis am
Mittwoch Zmidaag kasch uf em Minschterblatz
mit em goldige, silbrige oder kupfrige Diplom
d Ladäärne go luege.